



GLOBAL TRAINING
NETWORK

KE A BIIBAL A LAYNA NO A COOXIT

June 2025

Ke a cangin ale a fofna

A Cangin 1: O ga o sadku too a xuud

A cangin 2: Kaa I ndef jaajal waa ndoxneena ke da saqna

A cang 3: A Cangin ake kam Nqaariit Nqiid ne na laytaa no Gec'noox na Roog too Cooxtaa no fud o letu ndefu fer le no cit ne daawteena na Yirmande kam Nqaariit Nqas ne.

A cang 4: A Cangin ake na Biibal na laytaa no ci'it kam 2 Korint 8+9

2 Korint 8:1 – 15

Lalgand no paaxel

2 Korint 8: 16 – 9 – 5

Jeg o woor no kaa jofna no xaaliis fo ke doxnee'oona

2 Korint 9: 6 – 15

Ke I mbarna o ndeefan ndax I lalit a fat ale Roog

A cangin 5: fi daap no kaa jofna no ci'it

Ke na wideeel kam a cangin ale

A cinj a cang ale nu mbara :

- Njeg o ga o sadku too a xuud no kaa jofna no xaaliis fo o jeg kam adna feeke too mbaad pexey ndax nu njiriiñoorit a den kam maat ne Roog .
- Ngidim a Roog yaam o ten jegu fop too kam o paaxel um, a dalna a nuun o saasaytax no jeg oleene ta doxnina a nuun ndax ta jiriñooritel kam o ndam um .
- Andiloox ee ne o cooxtitaa ke adooxna fo ke moyna o faax no halal of fo no jeg of yaam ne Roog a barke'oonga , kaa o poxotaa a Roog o ndam , barke'aa jangu fee , laltaa o mbeq onqe Roog a jegna no wiin we fop too pisiid a suptax no ngim nuun na pexey yirmande fee Roog .
- Jeg a kebax too fer o saadfoox no ke Biibal a jagnitna no kaa jofna na cooxit .
- Waad pexey ndax ne o cooxtitaa a poxot a Roog o ndam , topatooxaa pasil of no coxla ke ten too fokat kalal na asamaan .

Sambandaal Biibal na Cooxit ale fi'eena a caf a mayu kam o ngidim a Roog yaa i maaka
kam yirmande feene no cooxit ale . (2 Korint 8:7; 9:11-12)



KE A BIIBAL A LAYNA NO A COOXIT

A cangin 1: O ga o sadku too a xuud

O saar ole yoonandteena a cangin ale : 1 Timote 6: 17 – 19

“Mafooxi we ndefna yaal kalal ke ndiiki, ndax magnandooxke, to a mbañ o pek yaakaar den na halal fa ngenee sen. Layi a den koy, da ndoon yaakaar den na Roog, ten fee na cooxaa a in fop, a mayfandin boo muut, ndax I mbelakinoorin. Regdinooxi a den, da mbi’aa paax, a ndef siide na pi a paax, kam den a yaaj, da nqaajraa fo lakas we ke da njegna. Neene, xan a mbokatanaa a qoox den halal fa mbaax fa ndoone no satku yaam o feet, ndax da ndam no ñoow o ndiindigil ole”

And ndefu we njegna kalal ?

- We njegna kupu ke da soxla’na no ñaamel, no ñirax fo no pind ke da genna .
- Ñak o day na tekit ale i cooxitna no “yaal kalal ke” a waaga o tax boo i njooxaa we ngupna a in xaaliis fo o jeg.
- Mayu kaa ndef yaal kalal kam adna fee, ta ref we njegna kupu no ke da soxla’na no ñaamel, no ke da ñirooxkaa fo pind ke da ngenkaa .

A kebax alaa I mbarna o ñoowit : Nen waa na ndeefaa a Kiristaa, kaa I mbar o njiriñoor o jeg in ndax ta fadin calel ke Roog kam adna fee .

Ke nu njegna fop kaa ref ci’it naa inoorna na Roog . (James 1:17)

Roog kaa bug nu njalandoor fo ten yaa nu mbadnaa o bug ole ten took lanq ke .

A sofangaa ee Kiristaa refu o maad nuun no ndigil, nene boog, kaa nu mbog no maat naa fogreerna fo ke na adna fee. Maat ne Kiristaa kaa guutatir no ne ta ñaaynita, a guutatir no ñoowod fo ciko , a guutatir no kaa jofna no xaaliis .

Apootar Pool koy, hate’ee we ndefna “yaal kalal” , bar o hate’a den ndax ta mbaas kalal ke den. Kaa xooyaa a den / a in ndax i ndef waa na topatooxaa a paax kalal ke Roog a cooxna a in .

Kam Maat ne Kiristaa, i andilooxa ke na wideel no kalal adna ke refu i ngeeraa **halal faa fagkeerna na asamaan**. Bar o gec’noox no ke halal adna of a bisiidkang . We na njalaa too a ngeraa kalal kaa mbaafkeerna xan a ndaaw ndafid den na asamaan .





Fat nu niir MACE 6:19-21

“Ba nu mbokatanoox halal na adna fee me max ke fo nqoy ke yaqtaa, soo guud we ndactaa, a nguudaa. Fat nu mbokatanoox halal na asamaan maa max ke fo nqoy ke a naangeerna o yaqtaa tus fo maa guud we a ndactitkeerna too nguudkee. Yaam me halal of a refna, maaga yiif of a refkaa itam.”


- Kam adna fee i ndefna, na wiin we a liibtaa o jeg fo halal ?
- Boo o kiin a geeraa “halal adna” xar nu mbaagu o lay no ijooow den , ke da ngimna fo ke da mbi’na ke hupna o njiriiñ?
- Xar “geeraa halal na asamaan” a tektu ”?
- Xar refu laamit ke i mbaagna o laamit a qoox in ndax i and o ga ndigil ole na nqeeñ no halal adna ?
- Boo Yeesu a war’ina o baal o ijooow of, xar a laykoogu ee ten refu halal of ?

Ke fofeena : fa lay fee Yeesu kaa refan fop we ndefna daalbe um . Layee ee o kiin waree o geer halal na adna fee , ndaa kaa lay ee o kiin oxe kaa war o jiriiñoor halal adna fee ten ndax ta dimle’it kam calel ke Roog kam adna fee ndax Maat ne Ten a jof mbaamir.

Nen o taalbe Yeesu, ke i ngimna fo ke hupna o njiriiñ na in kaa suptooxataa . A suptax aleene kaa duqaa refee soom o ga in na xaaliis fo halal ndaa no kuu refna no ijooow in kaa war o refan o Yaal oxe. (waxtu, o jeg, o ngim, calel, basil ne no ngim onqe, ndilnir fo basil, o and fo xoy ole,cit ke no Yiif le,a



qalaat



ake.)



Mam refu no ñoow of me jechoona a suptax ale hupna o magin no ga ole faafkeerna ?

Mam refu no ñoow of me bugoona o ga ta jeg a suptax ale hupna na pexey yirmande fee Roog?

KE I NGA'NA KAM BIIBAL FEE

- A jega xa per 2.350 kam Biibal fee na laytaa no kaa jofna na xaaliis
- No xa per betaafoleng axuu ndefna kam Mace, Mark, Lik a jega o leng olaa na laytaa no ka jofna no xaaliis
- Ke hupna na naxax ake Yeesu no xalal a laytaa
- Ke Yeesu a layna no xaaliis fo ne ta warna o jiriifoortel hupu ke ta layna no ke jofna na asamaan fo fidel

A qalaat fo xa ka'oof xa ñaq no kaa jofna no xaaliis

1. Xaaliis tig paaxer a refu

Niiryo 1 Timote 6: 9 – 10

“We na kasaf-kasafnaa na halal, a naaga o yeena no mbog fo na yuxum akaa o leng a andeerna xoox um fo a caf um. A yuxum akeene koy na njogolaa wiin we no luubax fo na sanjxax. No fex xaaliis, paaxeer kuu ndefna a ngataa. A jega koy waa andoona yee owaa njegan, a ngof o ngim onque, soo a yenan a qoox den no coono kaa o leng a sadeerna o ga”

- Ndax xaaliis na rimaa paaxeer kuu ndefna ?
- Xar refu ke na laltaa na Kerceen ee o bug ole no kalal ke hupu doole no ñoow den ee ñoowit ne Roog a bugtuuna?



2: Xaaliis kaa pisiidaa o ñaay

Niiri : 1 Timote 6:6-8

Ndaa koy, ndigil kak oo: O reef a Roog a cur halal oo , yaa deyfooroona ke jechoona . Yaam I pisiidee dara , ye I ngaraa na adna fee too a wooraa yee bo I ndetaa , I pislooxke dara . li , yaaga koy, I njegangaa ñaamel fo ñirax , a wara o dey a in sik.

Oxe bugna xaaliis, xottitkee teen dara ten fo oxe bugna halal mbodu, keene fop jeggee o njiriin o leng.
(O Baawaare xe 5:10)

Xar a jiriinka o kiin ta jeg adna fee fop yaa ta ñakna o law um?
(Mark 8:36)

Baa o ñoow nuun a haan na baad xaaliis soom. Ndamyo no ke nu njegna rekk, yaam Roog kaa lay ee: “Xaykroong muk, too depkroong muk”.



(Hebre 13: 5)

O doylax : doylax no ke na xewaa no ñoow of, waas o njambat , fañ o yaawaa tig no lakas , too jeg yiif dalu . Weecit ke faafna too fañ o domatoox teen dara. Deydoor no ke o ñoowaa xayee , too jeg yaakaar no ke na xewkaa o feet, fañ o jeg teen diid leng .

Fat I niir Lik 12: 13 – 21

“O leng a ndeer no wiin mayu waa a laya a Yeesu yee: “O Yaal oxe, layi o maag es ta xaajir fa mi ke i mbarna o lam”. Yeesu a doonaan ee: “Koor oxe, an bekaxam no tig nuun boo um xaajanaa a nuun halal nuun?”

Yeesu a laya a den ee: “Yetooxyo too mbootu a mbeq halal, yaam o ñoow no kiin refree no njeg halal, kuu ta mayna may halal oo”.

Maaga, Yeesu a naxooxa a den ee: “Xa nqol no fes a mayu halal a mbat’a mayu. A xalaata taa no yiif um ee: “Xar warum o fi, yaam jegiim maa geekuuma saxade le mi? Kaa koy a laya no xoox um ee: “Kene warum o fi. Xam yaq tap ke mi, riwatin kaa moyna o magin. Xam geer teen kaaf es fop fo o jeg es fop. Cinj kaaga, xam lay na xoox es ee: “Wo, o law es! Jegaa paax mayu kaa geekanoona a xoox of boo xa kiid xa mayu. Naagi ñootnooxa, ñaama, yeraa, felakinooxaa ! Kaa koy, Roog a layaan ee: “Nawtul feene! O yeng oleeke saxsax xan o ñis of a xuufel, too yaaga boog an na jegkaa ke geroona? Neene derj a nandu no xe na fokatanooxanaa a xoox um halal, too jeggee a Roog ta ref halal um”



- Xar refu ke layeena no koor o mayu halal oxe no ndooran ne na naxax ale?
- Ndax kaa Roog yoonnee no halal fee fo o jeg ole ten ?
- No xar o yaal halal oxe a juumtu ?
- Widti fo a piis a kurul keƴ fop me o yaal halal oxe a layna “mi” mbaat “ke mi” xar keene a jangnaa a in no kaa jofna no koor oxeene ?
- Xar taxu Roog a xasanin ?

Ke fofeena : Kaa I mbar o andiloox ee bakaad fee kam a betandax ale refree o jeg halal mbaat o maydandin. Bakaad fee refu yee o koor oxe kaa jiriiñoor halal fee na xoox um soom fo no ke feluuna .

Jeetaay no laamit

1. Xar refu ke taxna I moy o yufanaa halal adna kee qupu kalal ke yaqookeerna too a ndefaa boo kili ? .
2. Daki o niir o peƴ ole wareena o geek no yiif (1 Timote 6: 17 – 19). Layi ne o ga oleene a waagna o ƴisiid a suptax no ñoow ole na jangu fee fo kam saate fee.
3. Xar refu ke na ƴisiidaa ñak o doylax kam o ñoow nuun ?
Xar refu ke nu mbarna o mb'i boo nu ndicooxke mukƴ ke faafna, moytoox a yaaw no ke xaaye fo diid no ke na garaa o feet?

KE BIIBAL FEE A LAYNA NA COOXIT

A cangin 2: Kaa l ndef jaajal waa ndoxneena ke da saqna

Limi mene ke jechoona .

- mbind / a ndok	- o mobileet	- basil	- _____
- xa qol	- a sareet	- calel	- _____
- muumen /a ked	- pis	- ñirax	- _____
- a cek	- o oto	- calir	- _____

Niiri a qef ale Dawid kam 2 Caloori ke 29:10-20.

Xar refu xa toq axe Dawid a moyna o laytaa kam a qef aleene ?

O perj na cangin ale : 1 Caloori ke 29: 11 - 12

11 O Yaal oxe, wo jegu o magnel fa katil fo o mosel fo o ndam fo o niwel. Fop ke refna na asamaan fo took lanq ke wo jegun, yaam wo refu o maad, o Yaal oxe no pindel ke fop. 12 Halal fa tedaanga na wo a ngataa, wo fee na maadooxaa took fop. Wo jegu doole fa katil too o pay of a waaga o magnand too a safkand fop.

Ndigil ne l mbarna o ngeek too ñoowtin : Roog jegu fop

Sake le: O Yaal oxee jegu lanq ke fo ke refna teen fop , a jeg adna fee fo we ngenna teen (A Kim a Tedu ke 24:1)

Cer ke nuun : Kaa nu andee yee cer nuun ndefu ngenand Yiif Tedu le, Roog a cooxna a nuun? Feek oxey na nuun koy, nu njagatee a qoox nuun. (1 Korint 6: 19 -20)



Xa ñjoow nuun fo o daaw nuun : Xa kiic es kunpa'irang, ye o moolaxam na pet, sakaxam no fud ya es. A kid of kaa nga' oogam, ye saqafuleeruuma o mem o leng .Bind'aa yaaga no safe le wo xa yeng axe hapan'axamoon fop , yaaga o leng na den ferafulee. (A Kim a Tedu Ke 139: 15 -16)

Halal of fo o jeg of

Mi jegu xaaliis fee fa wurus fee fop , mi o Yaal oxe hupna fop layun (AGE 2:8)

Fat nu mbetandoox ee o Yaal oxe Roog nuun na ci'aa a nuun doole faa nu njegitna halal feene,...
(A CANGATIN ALE 18 :8 a)

- Nu njegee cer ke nuun.
- Nu njegee o daaw ole nuun
- Nu njegee o wod ole mbaat sax halal fee nuun.

Kaa i ndef waana doxaa / ndoxnel , ndaa i ndefee we njegna tiye !

Fop ke i ndefna fo fop ke i njegna Roog sax jegun. Kaa doonin na xa pay in o nqap ndax i ngaynaakin ne ta bugtuuna.

Ne I mbarna o mbi ndax i andiloox o bug ole Roog no kalal ke fo ke ta doxinna a in . No ne Webster a laytuuna, o yeeyetax kaa ref oxaa doxneena o jeg no kiin . Kaa I ndef waa Roog a doxinna o jeg um ye I maadna o ndefaa took lanq ke . A waaga o doxin a in tig magnu mbaat tig neewu fo ne ta bugtuuna , ndaa I mbaree o njegooxin muk .

A sopangaa ee I njafa o ndef waa na topatooxaa kalal ke Roog ne ta laytuuna a in kam fa lay um, Roog xan moy o coox a in a toq akaa nqupuuna . Ndaa xar taxu ta doxnika oxeene (o koor/ o tew) lakas kaa moyna , na topatootan ne ta bugtuuna nen kaa ta jegoodna ?

Jangi MACE 25:14 - 30.

(Ke xewna na Mace 24 fa 25: Yeesu kaa jangnaa no kaa jofna no muukandoong adna . Kaa jangnaa no kaa jofna no ndun ne saqitna (24:32-35), o pad' o kore'u xe (24:45-51), roog xarboxay we (25:1-13), a naxax ale no xanjar axe (24:14-30), paal kef o pambe ke (25:31-46). Ke a cangin ale a fofna fop refu keene, a sobangaa sax ee o leng andee bes fee Yeesu a xottiidkaa kimu we na adna fee , kaa i mbar o mbaajaa too ngen no njooowtaa ne ta bugtuuna too nqore teen. Xanjar ref'u ke liibtoogeena o mefel xaaliis mbaat wurus . O xajar o leng no xaaliis fodu fo ndabid no xa kiid 20 , o xanjar o leng = xa monjong 75 /34 kg).

Xan a refahin nen o kiin oxaa andoona yee ka njaykaa too a xoy fad' um ndax ta doxin a den halal fee ten. A cooxa o leng xa qanjar xa betaq wurus, o lakas xa qanjar xa faq, soo o tatkandeer oxe ta cooxin o xanjar o leng kut, oxuu refna podnaa ta hatilna, too a sogkaa o ret. Ndak-fo-ndak, oxe doxin'eena xa qanjar xa betaq a reta, too a rimand a den boo a jegat xa xanjar xa betaq xa lakas. Oxe jeg'ina xa qanjar xa faq axe itam a reta a rimand waa ten, too a jegata xa qanjar xa faq xa lakas. Oxe daaw'ina o xanjar o leng kut ole koy a reta, too a gas o njemb, a dasin taaga xaaliis faa o yaal mbind ne a doxin'uuna.



Yaa ta miina, o yaal mbind no fad' waa a nomtooxiida too a laac a den ke da saqan'uuna. Oxe daaw'ina xa qanjar xa betaq axe a gara, a pisiid xa qanjar xa betaq xa lakas, a layin ee: "Yaal mbind! Xa qanjar xa betaq doxin'axamo, rimandaam xa qanjar xa betaq xa lakas koy. O yaal mbind um a layaa ee: "Jook a njal, o pad o paax o kore'u xe! Goore'aa no tig neewu ten taxu xam doxnong mayu. Rokiidi too felakinoox fo o yaal mbind of! Oxe daaw'ina xa qanjar xa faq axe itam a matiida a layin ee: "Yaal mbind! Xa qanjar xa faq doxin'axamo, rimandaam xa qanjar xa faq xa lakas. O yaal mbind um a layaan ee: Jook a njal, o pad o paax o kore'u xe! Gore'aa no tig neewu, ten taxu xam doxnong mayu. Rokiidi too felakinoon fo o yaal mbind of! Naaga itam, oxe daaw'ina o xanjar o leng kut ole a gara, too a lay ee: "Yaal mbind! Mi de, kaam and'u yee o kiin o tomu tid refo, too koo saxadaa kaa duufeeroona, fokataa itam kaa feeseeroona. Kaam diid'u boo ten taxu ye retoona, um dalfo dasnik ke doxin'axamoona kam lanq ke. Am, janggi ke jechoona! O yaal mbind oxaa layaan ee: "Wo so ref o pad o soxodu too feeñaak! And'aa xil ee kaam saxadaa kaa duufeeruuma, too fokataa kaa feeseeruuma. Ten taxu koy, kaa o war'u rawnit xaaliis fee mi, ndax um nomtoxiidangaa um waag o daaw ke ta rimna. Njabyo o xanjar ole ten, too cooxin oxe jegna xa qanjar xarboxay axe. Oxe jegna, xan a ci'el, too xan a moy o mayif ndaa koy oxe jegeerna, onqe ta jegna sax xan a jafel. Ndepyo o pad o cegee njiriin oxe tafil kam xa nibaam axe maa xa lool fo caxrand a njiiin a ndefkaa.

- Kam a naxax alene, layi ne Yeesu a nandna “ o goor oxe retna a ñaaciik” fo ke I nandna fo fad weene.
- Xar nu mboogu ee ten taxu xa qanjar axe fad we a ndaawna fodree ?
- Nam o pad o kere'u xe a daawtu ndabid um ?
- Xar refu ke dalna o pad o peeñaaku xe?

Ke fofeena: A naxax aleeke kaa njangnaa a in ke i mbarna o mbi fo ci'it ke fo o waag ole Roog a cooxna a in ndax i pisin kam calel ke ten kam adna feeke bo yaa Yeesu Kiristaa a nomtooxiidkaa.

- Roog jegun fop: Roog a juga sañsañ ke fop, ndaa in a doxnu keene fop .
- Roog a waaga o jiriñoor xaaliis mbaat o jeg ndax ta maaknoor a in .
 - A waaga sax o ref kaa i njiriñooraa kam a cagin ale ndax i mbaag o moy o ñoowanin (Filip 4: 11 – 12),
 - a waaga ref deetlax (Lik 16: 11 – 12),
 - mbaat sax a cur seede (Mace 5 : 13 – 16).
- Ne ke daawoona a fodna ref ee ke hupna o njiriñ ndaa a pesoorot ale refu fop. Roog fañtee o jeg halal ndaa layee i yoq kam o ñak ole . O ten jegu keene fop, ten taxu topatooxi a paax fop ke ta cooxoonga .
- O ngim onqe in kaa yoonaa fo a pi.
- Xar nu njangtu na naxax alene na laytaa kaa jofna no ne nu njiriñooraa ke Roog a doxinna a nuun?

A SAYTAX NO KE DOXNEE'OONA NE BIIBAL FEE A GA'TUUNA : Jiriñoot cit ke fo calir ke Roog a cooxaanga (o daaw, o waag, halal, ndigil, nqiipoor) ndax ta fadin o bug ola fo daap ne Roog. Kaa i ndoxnel kene fop itam ...

- **Daaw**
Andnoori a in ne o ñoow ole a rapitna, ndax I njeg yiif (A kim 90: 12)
- **REW WE**
*Mbind fo halal kaa lamteel no daan waa , o tew o jegu yiif o mat , ci'it no Yaal oxe yoo.
(Xa Petit axe 19:14)*
- **Xa piy axe**
*Xa piy kaa ndef ci'it no Yaal oxe, o rim ole xatna no laaw ke a ref barke fa ngatu no ten
(A KIM A TEDU KE 127.3)*
- **Xaaliis**
Boo nu gore'eerna no kalal leweer ke na adna fee, an na doxinkaa a nuun kalal tigil ke? Boo nu gore'eerna no tig no lakas itam, an na cooxkaa a nuun ke nu njegna? (Lik 16:11-12)
- **Ci'it ke no Yiif Tedu le**
Oxuu refna na nuun kaa ref nen o tag o paax oxaa Roog a doxinna ci'it pogreer. (1 Piyeer 4:10)
- **Yegil mbaax ne**
A sopanga yee neene tige saxtu koy; kaa nu mbar o feet a in nen dag Kiristaa waa ndoxneena o ndaawnaa lakas kunpa ke ndefna na Roog . In we ndoxneena koy, ngor tigi I laamte. (1 Korint 4: 1 – 2)
- **O sir ole Roog**
Ten taxu mbootooxyo boog na qoox nuun fo no siir ole Yiif Tedu le a doxinna a nuun, nu ndef teen aa-adax. Ngayyo o fog ole no gimu we Roog a su'nitna fo'oy xooxood um. (A PI AKE 20 . 28)

Nam o ga of no xaaliis fo no halal a waagu a suptooxit a sobangaa koo laamtooxaa bes fuu refna , “Nam Roog a bugu um njiriñoorit xaaliis fee ten ?”.Xar waago o fi ndax o wetandoox ee koo ref oxe na topatooxaa, /oxe doxneena kalal kef o o jeg ole Roog ?

KE BIIBAL FEE A LAYNA NA COOXIT

A cangin 3: A Cangin ake no Nqaariit Nqiid ne no Gec'noox na Roog too Cooxtaa no fud o letu, refu fer le na cangin ake na cooxit kam yirmandee fee refna kam Nqaariit Nqas ne

O perj na cangin ale : Malaki 3:8-10

"Ndax o kiin a waaga o guud' a Roog ? Yaag oo toox de , kaa nu nguudfaxam .

"Soo nu laamtaa yee , 'Xar i nguudfang ?'

"Na seek xarɓaxayandeer ake fo no sadax ke nu boxotaxam o mat nu nguudfaxam . A salax ake kaa ndaabaa a nuun , yaam ne nu nguudfaxam , nuun saax le fop —. BringNaangyo bisiidaa a seek xarɓaxayandeer a teyu sik no Mbind es ndax ñjaamel a njegaa teen kili . " Teetloorangaamo neene , mi o Yaal oxe Hupna fop boo nga ndax suqtankiim a nuun pand ken a asamaan soo mayɗand a nuun fo paax bor .

O saar oleene yooɓaand o jiriiñooraa ne ta waritna ndax ta riñ gimu we na cooxit ale na seek xarɓaxayandeer ake ne ta layteena kam Nqaariit Nqiid ne.

Lalgand naa i mbarna o ñoowit: Ndax o and o yaajel ole na yirmande fee Roog , kaa i mbar o ndef kerceen kaa na cooxtaa , a ndimle'taa no ke da njegna)

A cangin ale fofeena : Xar i andu no kaa jofna na qaaj xarɓayandeer ake kam Nqaariit Nqiid ne fo ke ta laamitna ?

- Xar taxu i mbar o cooxit a seek xarɓaxayandeer ake? Faɗoox a Roog too lalit a nqoolax fo yaakaar motu sik no ten soom .
- Xa saar xa cegu o njiriiñ : A Paɗax ale 27:30-32; A Lim ale 18:21-24; A Cangatin ale 14:22-29, 26:12
- Keene kaa ref a pi'ood' akaa na mbi'eel kam diine mayu fo aada ke na jamaane fee i ndefna .
- Kaa Isra'el a xeblel ndax ta fi'in.
- Cooxti 1/10 fo ke jechoona , xa qol of fo a ked of (yooɓee o ref xaaliis).
- Dimle aa-adax we fo we na mbadnaaa sadax ke , den we njegeerna dara kaa da lamna too njegee lanq itam.
- Dimle'it na paɗax ale no Mbind Roog ne fo no toofeen mayu ke na mbi'eel fo no sadax ke
- Dimle rool we, ñjaaw we , xa baan axe fo katakoon axe no saax le .
- Fat i nqooland ne ta fi'teel :
 - A lim ale no sadax ke (leng, fik mbaat tadiik kaa nqaajeena)?
 - Waxtu fee sadax fee a fi'eel (no xiid oluu refu mbaat na qiid xa tadak axuu ndefna)?
 - 'Baxañ ke na sadax fee fo ne sadax fee a fi'teel (laytaan kam Biibal fee)?

A jega kebil mayu kaa Roog a coox'ina xeet fee Isra'el kam Nqaarit Nqiid ne na laytaa kaa jofna na cooxit . A seek aleene koy, kebil ke simtun , kaa heblitoogu fop a cooxit a seek a xarɓaxayandeer no saxadee le fo no cegel ke den.. Nene koy, Nqaarit Nqiid ne kaa laytaa sadax mayu- oxe na fi'aneel Leelewi we , lakas ke a fi'eel na ñaañnot ale na jangu fee fo qew ke na ndoofandeel , fo sadax ndadkandeer naana fi'aneel rool we tiig tadiik kuu ndefna . (Lev 27:30 ; Numb 18:26 ; Deut 14:24, 2 Chron 31:5)

Sadax ke fo ke na ci'teel kam Nqaariit Nqiid ne a fi'tel ke eeteena o saxad , kaa fi'el ndax ta refan fop ke saxadeena no lanq ke . A seek aleene cooxoogeena a Roog kaa refu nen a pesoorof alaa laltoogna ee o qol ole fo kalal ke fop o Yaal oxe jugu a den too o ten soom refu oxe ci'na a den li-isra'el we ndax ta topatooxin too a mbelakinoox teen.

Jeg ngor no ne i njiriĩnoortaa o jeg in refee ee Roog soom simtun , kaa laltaa o sadkel ole no ngim in . O bug tig ole, oxe na waadaa ke faax na xoox um soom , oxe xalafna too halal a adnin _ keene fop kaa laltaa ee o ngim in ngecnooxee na Roog ndaa no xaaliis . Nene koy, ngor in fo ne i cooxitaa kaa laltaa ee na Roog i doonu yaakaar in.

Ndax a seek xarɓaxayandeer ale a simte kam nqaariit nqas ne?

Kam yirmande fee no Nqaariit Nqas ne , kerceen ke kaa da ci'el o njeg a qoox den na cooxit ale na seek xarɓaxayandeer ale. Jeg ee sen kam Nqaariit nqas maa ta layeena ke o kiin oxe a warna o kesaan a Roog no ke ta jegna ndaa a layaa ee ke na cooxteel kaa war o liipoor fo saxadee le . I nga'a ne Nqaariit Nqiid ne heblitna a seek aleene nen kaa na doxaa a in no ne i cooxitaa , in we ndefna Kerceen ke no nqipoor nqas ne . Nqaariit Nqas ne kaa moy o lalytaa no kaa jofna no njiriĩn onqe fo no barke ke i ndaawaa yaa i pisiidaa o jeg in . Kaa i mbar o cooxit ne i mbaagtuuna . Leek-leek, i mbaaga o cooxit kaa hupna a seek xarɓaxayandeer ale , too keene kaa sipoox no ke keceen fee a waagna fo no soxla ke no jangu fee .

Took keene fop koy, a seek xarɓaxayandeer ake fo ci'it ke kaa mbar o mbi'teel no fud o letu fo no a pesooroof alaa na simataa a Roog fo no calel ke no njer ne Kiristaa. *"Fat oxuu refna a ci'it ke dalna no xeeñ um, too baa ref fo a tagid a ŋoofu, baa ref itam fo a yiif-a-fak, yaam oxe na ci'taa fo o daay soom Roog a bugu. 2 Korint 9.7*

Jeg ee a yiif a ɗak, a cooxit ale jangniteena kam Nqaariit Nqas ne i cungeel too kaa war o deetel nen yirmande faa i njegna no waag o yip o jeg in no calel ke no maat ne Roog . Yaam ne Roog a ci'na a in yirmande um, i mbaaga o njeg a tipax no cooxit too yaaj kam no ke i njegna, ta may mbaat ta neew.

Xar i andu na cangin ake na laytaa na cooxit ale gec'nooxna na yirmande kam Nqaariit Nqas ne?

- Cooxit yaam yirmande fee Roog daawoona
- Cooxit na jamaane fa mbaax fee fo na jamaane fa domu fee
- Cooxit no fud o letu , baa ref yaa o fi'nooreena o ten
- Cooxit kam a qef ake
- Cooxit fo yiif boxotooxu,
- Cooxit no fud o letu , cooxit ne waagtoona fop
- Cooxit fo o daay / fo o mbelakinax
- Cooxit kaa fodna fo ke jechoona s
- Cooxit ndax o dimle'it no calel ke no maat ne Roog

Xar refu pexey ke Biibal fee a jangnita no ne i mbarna o nqaajrit o jeg in ndax i ndimle'it no calel ke Roog?

1. Wiin we na jangu fee kaa cooxtaa ndax da ndamit aa-adax we fo jaajal we fop.

- Leelewi we (A Lim ale 18)
- Calel ke Yeesu
 - a. Lik 8: 1 – 3

“Cinj kaaga, Yeesu a retooga ndeer saate fa saate a waare’aa too a yegnita Yegil Mbaax ne no Maat ne Roog. Xarboxay fo dik waa a ndeefanaan. A jeg’a itam rew lengleng wa mbodand’eena, too cini fo xa domel xa lakas a ndam’u a den yaaga. Mari-Magdala fee cini beta faq a sutoor’ina no ten, fa Yowana fe o tew Kusa a ref jawdiin Herood, fa Susaan fo wiin lakas mayu waa ndimle’oogna a den fo o jeg ole den, fop maaga a ndeefu”.
 - b. Lik 10 : 1-8 (nduleer ne no 72)

Ndalyo no mbind naaga, ñaama yeraa ke nu mbugko cooxeel boo yaa a tet nuun a fadkaa, yaam oxe na jalaa a wara o rabdel
- Apootar Pool
 - a. 1 Korint 9:13-14 (9:1-14 ... mérite d'être soutenue)

“Ndax kaa a yiif nuun a naax ee we na ndagooxaa a Roog kam Mbind Roog ne fop , ten a ñoowtaa , we payna no sadaxand ole a ñoowtaa ke foxottiideena no sadaxand ole “? Ten taxu o Yaal oxe a hebil ee: we na njotnaa Yegil mbaax ne xan a ñoowit ke hatna no Yegil mbaax ne .
 - b. A pi ake 18:4-5

Bes a ñootnax aluu fad’ina, Pool kaa jeetaayoogu fo waa ndeefoogna no mbind a qef naa. Kaa jeemoogu o gimnoor yaawuur we fo Geegerees we itam. Kaa koy yee Silaas fa Timote a inooriidna Makedoni, Pool a pay’ata no waare’ aa fa lay fee Roog, a feednaa yaawuur we yee Yeesu refu Kiristaa fee, refu o Muumucil oxe regteena.
 - c. Rom 15: 23 – 28

“Ndaa ndiiki koy, fadnaam cales es na xa cegel axeeke refuuma. Xa kiid xa mayu xey, kaam waajaa o deetiid a nuun. Bugaam o fi keene yaa um retaa Espaañ. Yaakaaraam o ga a nuun, yaa reefiuduuma meene boo daaw o ndimle nuun, ndax um waag o suur no sax leene, ta ref itam o woof olaa um waagkaa o moofit fa nuun boo ñaal lengleng...”
- Xa saar xa lakas
 - a. 1 Timote 5: 17 – 18

“Maak we no mbokatax ne no gimu we ndefna aa-adax mbaru o ngup ndabid, moytaa sax we na mbaare’aa, a jangnaa, yaam a Pind a Tedu ke kaa lay ee: “Ba nqoox ne na sugaa a suunjuuñel too “ ndabid a wara o caajal”. (Deut 25:4)
 - b. 3 Sañ 1: 7 – 8

“Weene koy, gon no Yaal oxe Yeesu Kiristaa inu a den, da mbaare’aa, a ndetaa, ndaa njangtee ci’it no xaa refeerna o kimu na Kiristaa. Ten taxu, in we nigimna, i mbara o ndalnaa wiin um, ndax i ndaar, ndend fa den no qol ole no ndigil ne”.

2. Kaa I mbar o cooxtaa ndax I ndamit pasil ke in.

1 Timote 5:8

"A sopangaa yee o kiin topatooxee wiin um, a eetit no pasil um, oxeene a gofatira fo o kimu, too ten moyu faaxafar o kimeer".

1 Timote 5:16

"A sopangaa yee o kiin o kimu, ta ref o koor mbaat o tew, kaa jeg o ñaaw oxaa refna o pog um, fat a topatooxin a paax. Ba mbokatax ne no gimu we a gadneel o ten. A fi'tange neene, xan mbokatax ne no gimu we a waag o geleeroox a faambir fo we ndefna ñaaw, too mbaagoodee dara".

3. Kaa I mbar o cooxtaa ndax I ndimle'taa no soxla ke no jangu fee

1 Saŋ 3: 17 – 18

"O kiin a jegangaa kalal adna, too o ga o pog um a ref na soxla, soo ta palgin o laaw um, nam o mbeq onqe Roog a gentu no ten? Xa tepandoong es ba i mbex na ñiiñ fo fa lay soom, ndaa fat i njeg o mbeq na pi fo no ndigil.

Saak 2: 15 – 16

"A sopanga yee o pog of no ngim onqe, ta ref o koor mbaat o tew, a paŋde mbaat ta ñak ñaamel, too o leng na nuun a layin ee: "Reti fa jam rafook! Yaasam o jeg ñaamel! Soo a fañin o coox ke ta soxla'na no cer um, xar kaaga daxu? "

4. Kaa I mbar o cooxtaa ndax I ndamit rool we: we mucna fo we muceerna .

Mace 5: 42

"Ci'i oxe na xedang, too ba o xañ oxe na luɓang tig"

Mace 10: 42

"Oxuu ci'na o leng na xa tepandoong axene a tokol foofi fo puupu yaam ne ta refna o taalbe es, no ndigil mexe layaa a nuun ee: ñakkee o daaw ndabid um"

Waagaa o cooxtaa too simatkiro, ndaa waagiŋ o simataa too cooxtiro , (gidmaa, simataa, laltaa o mbeq of, o daw of, fo o jeg of no xeeñ xoolu laa yoonna fo o ngidim ..) Yeesu a laya na Mace 15.8 ee:

"Xeet fene, xa ton den soom a niwtaxam, ndaa a qeeñ den kaa gofaam. Ne da ndeeftaxam jegee o njiriiñ....." (Mace 15:8-9)

Kaa koy, ne I cooxtaa a haala a Roog . Ke hupna o njiriiñ na kid ake Roog ref ee ke i cooxtaa ndaa ke taxna i cooxtaa.

Nam a reftu na nuun koy? Nam xeeñ of nandaa yaa bugoona simat a Roog fo xa tim axe no ñoow of ? Boo nu ci'taa ndax kaa nu mbi'an nen kaa nu saseena, ndii ta ref kaa nuu mbi'na wargal, mbaat ta xat no xeeñ mayu fo o daay fo o ngidim yaam ke Roog a cooxonga fop ? Deetyo a paax ke Yeesu a layna: a simat ale inooreerna no xeeñ kaa ref soom a pi' no xe na fi'ooxaa o teereef a Roog .

Jeetaay fo laamit

1. Boo ta inoorna no cit na fi'teena no fud o letu , xar a tektu na nuun, coox a Roog ke adooxna fo ke moyna o faax?
Nam keene a nandkoogu kam o ñoow of ?
2. Xedí a Roog ta duq xeeñ of too a dimle'ong o waag o nadiloox ke taxna boo o cooxtaa , mbaat ken a yaqanang o ref oxen a cooxtaa .
3. Boo ta refna yee a cooxit aleene kaa ref ke nu soogaa o and , xedí a Roog ta ci'ong njambaar ndax o tipoox no jaf oleene no ngim onqe.
Boo refoona oxe na coxtaa too a safik no ngim onqe , xedí a Roog ta maaknoorong o waag o cooxitaa ne Roog a bugtuuna . Xedí a Roog ta ci'ing yiif laa maakna na cooxit no fud o letu.

KE A BIIBAL A LAYNA NA COOXIT

A cangin 4: Lalgan ne wareena o reefan (2 Korint 8- 9)

O saar na cangin ale : 2 Korint 9: 6 -8

Fat nu and kene: Oxe duufna o ndik, o ndik a saxadkaa, ndaa oxe duufna mayu o mat, mayu a saxadkaa. Fat oxuu refna a ci'it ke dalna xeeñ um, too baa ref fo a tagid a njoopu, baa ref itam fo a yiif a fak, yaam oxe na ci'taa fo o day soom Roog a bugu. Roog a jega katil faa ta maytanditna a nuun fo paax kuu ndefna, nu ngen no njegaa kili taxir soxla nuun fop, boo ta yoq kaa waagna o jal paax .

“Xaaliis koy Biibal fee mbaat o ngim onqe nqañtiran. A soƴangaa sax ee wiin we kaa njiriiñoortan leek-leek naa yooneerna fo o bug ole Roog. Ndaa o jeg ole soom ref ee bakaad. Boo ta jiriiñoorteenaa ne waritna ne fa lay fee Roog a heblituuna a in, xaaliis a waaga ref o leng na ƴaxaƴ ke i mbaagna o njiriiñoortel ndax o mbeq in na Yeesu Kiristaa fo a tipax in no calel ke no maat ne ten . Keene a waaga o liip a qoodel ole na tipax in fo nqĩpoor in na Kiristaa Yeesu . Ke jegna o njiriiñ refu jeg o and o saxu no xaaliis fo ne wareena o cooxit , apootar Pool, a binda xa saar xa faq kam 2 Korint no nqĩpoor ne xaaliis a jegna fo calel ke no Yaal oxe .

Contexte : Deux églises

Corinthe :

*Implantée par Paul lors de son deuxième voyage (Actes 18)
Ville portuaire en Grèce - centre militaire et commercial
Ville et église riches
Les croyants juifs et païens
Division au sein de l'Église
Engagement à aider Jérusalem
Un an plus tard, toujours pas de don*

Jérusalem :

*Commencée à la Pentecôte (Actes 2) 20 ans avant Corinthe
Sévère persécution (rejetée, arrêtée, exilée, exécutée)
Pauvreté financière (pas de travail, d'argent, de nourriture)
ont besoin de l'aide des autres églises pour survivre.
Paul encourage les Églises à s'entraider financièrement
L'Église est plus grande qu'un simple rassemblement local*



Cangu ke Makedoni

A saax ake ndefna no bemb Roog o janoon fo a ndeer ale no saax le Gerek

Filip Tesalonik fa Beere
(A pi ake 16, 17)

Pool sinju a den na ñaac'a fikandeer ale ten

1. Samandaal mayu no kaa jofna no paaxel (2 Korint 8: 1-15)

Ke xew'ina : Jangu fee Yerusalem kaa ref'u kam o ñak o tomu. Jangu fee Korint koy a daaw'a barke na qos xa mayu , ndaa a ñox ake fo qasir ke no gimu we, fo a pesoorot a qoolafaru a taxa boo jangu fee a xaan no tig lakas too a weec bargal ke ten , a suptayo o ga ole da njegna no maat ne Roog. Kene taxu Pool a coox gimu we Korint a yoonandin fo samandaal dík, xa as ndax da njeg a nqebax o cooxtaa fo ñeex letu .

A. Jangu fee Makedoni (Jangi 1 Korint 8: 1 – 5)

Bindi fop ke na laltaa o paaxel ole fo fop ke laltina ee we na jangu feene kaa cooxtoogu o jeg den.

8:1 _____

8:2 _____

8:3 _____

8:4 _____

8:5 _____

- Xar refu ke moyna o duq a nuun no ne jangu fee Makedoni a dimle'toogna a jangu fee Yeerusaleem no coxla ke den ?

B. O Yaal oxe Yeesu Kiristaa

Jangyo 2 Korint 8: 8-9

- I mbaagee o njeg ci'it na moyna o fad too a yoon fo yirmande ee ci'it ne Yeesu Kiristaa. Layi no tab ra6 fo xa delem of ke pe9 a bugna a feedin .

Layi nguutatir ne jegna a ndeer jangu ne Makedoni fa Kiristaa . Yaam, we no jangu fee Makedoni kaa ndef'u rool ndaa kaa cooxtoogu nen waa njegna halal . Yeesu koy, kaa ref'u oxaa jegna halal ndaa kaa ñoowoogu nen o ndool. Den fop koy a pi den kaa yoon fo yirmande , a cooxit a qoox den nen sadax yaam o sagu no lakas we.

- Adiloox yirmande fee ten .
- Kaa ref'u oxaa jegna xalal (O ten refu Roog, fee na asamaan).
- Kaa neewandoox'u too a coono'a mayu, (a xona yaam pakaad in) kaa fi'in yaam o d'aay ole fo o mbeq o magnu nqe ta jeg'ina .
- Kaa boxottox'u nen sadax fo o Mbaal onqe Roog na foritkaa pakaad ke na adna fee .
- Kaa cooxtoox no fud o letu – kaa felin ta boxot o ñjis um .
- Ndax in we ndef'ina rool (no yiif) i mbaagat o njeg halal ,ndaaw barke mayu na Kiristaa Yeesu.

Mbetadoodxyo: Roog jegu fop!!


Ke fofeena : A cooxit ale na Biibal fee kaa reefandaa lalgan ne no yirmande fee no Yaal oxe Yeesu too a inoor eetü no xeeñ boxotooxu no ten ,na fi'aa boo o kiin a waag o cooxtaa fo o d'aay, no fud o letu na jamaane fee i ndefna , o waag fo halal faa inoorna no ngidim a Roog ndax o waag o daaw keene fop .

2. A madax ale jangniteena no gimu we Korint

Jangyo 2 Korint 2: 8 – 15

A jega meeke tig dadik kaana yaqanaa o kiin ta cooxtaa no halal um:

1. Kene a waaga cung boo o feet (8: 10 – 11)
Xeboox o fi tig jaf lakas too ta warel o fi ndiiki
Kene kaa laytaa na xa “bay axe”. Waxtu fee a fada ndax i njofnoox na pi !
2. Jeg a yiif a dak (8: 11 – 12)
Jofand o feet ke waagoona o fi xaye, laamtooxa ndax xan o jeg o daaw.
Kene kaa laytaa no xoox le. Daawi o nand ole soxla’oona ndax o jang a kebax (tipoox) .
3. Ñak a qoolax (8: 13 -15)
Fañ o cooxit xaye yaam koo xalaataa coxla ke o jegkaa o feet .



Kene kaa laytaa no xeeñ . .

Gimi na Roog fo na tegit ake ten

- No tadik kene , layi ne mosoona o ga no ñoow of ?

Boo nu ñakna o daay ole refna na cooxit, fat tig tadik keeke a yoq na yiif nuun :

- a. Weeci ke nu jegeroona too xalaati no fop ke Roog a cooxoonga
- b. Fat o wetandoox a tegit ake Roog no kaa jofna na cooxit fo o daay (Filip 4:19).
- c. Fat o deetaqin xeeñ of ndax o ga mee waroona o maak na yirmande fee refna no cooxit no jeg of .

3. Ngor fo o jof no ke doxnee'oona (2 Korint 8:16-9:5)

Ne ci'it ke a mbi'teel kaa njeg o njiriiñ nen a pesoorof ale no xe na cooxtaa . Pool a lay kaa jofna na Tiit fo wiin lakas nandu nen o ten ngeekoogna fop ke cooxtoogeena kam jangu fee Korint.

Jangyo 2 Korint 8: 16 – 24

Wiin we njegna o waag fo we njarna o nqolooxel soom mbaru o ndoxnel a doq ale na xaaliis fee . Fat a deetloox a paax ke wiin weene a mbaagna .

8:16 _____

8:17 _____

8:18 _____

8:19 _____

8:20 _____

8:21 _____

8:22 _____

8:23 _____

Ndigil dikandeer ne xotteena no saar olene : fop ke fogna na xaaliis kaa war o ñaaynitel fo o jof too waree jeg luq luq fa leng, mbaat kaa na fi'eel na pet .

Roog jegu xaaliis fee too xan o Yaal oxe a laamit ne we ndoxin'eena xaaliis feene a ngaynaaktoogun.

Oxuu refna na in itam kaa ref o kaynaak no kend um. Boo wiin we a cooxaa cangu ke, fo no cael ke no Yaal Oxe, fo pokatax ke na njalana a Roog, Kaa da yaakaar ee ke da cooxitna xan a njriñoorel fo o jeg yiif olaa yonna fo o ga ole layeena teen fop .

- Nam nu ñoowtu jafe-jafe ke andona yee kaa da inoor no ñiak o woor fo a saytax no ne xaaliis fe a geekit'eena?
- Xar keene a rimu kam jangu fee, fo no mbokatax ne?

Jangyo 2 Korint 9:1-5

Pool a and'a ne wiin we yooɓ'ina o mbi'aa o ndik na koorgoorlax too a mboog ee a mbi'a cael ke fop . Kene kaa wetandaa a in ke i mbi'aa a cinj yaa l ndegitna tig too kaa laltaa o woor ole l njegna fo ne i topatooxtaa ke i ndoxneena . Keene kaa bisiidaa a koolax too a lalit o ndam onqe Roog.!

O njaflex onqe no jangu fee Korint, na cooxit , a sadkandtu jangu fee Makedoni ndax da ndef waa na cooxta fo o daay Xar refgoogu a pesoorof ale no jangu fee Makedoni yaa ta sob'ina yee jangu fee Korint mbi'ee ke da nqeboox'ina ?

- Xaajri o nqap onque yee fadnoona a tegit of no xaaliis to fi sax kaa hupna ke cungeoogeena, . Xar refu ke yeg'oona ? Nam Roog a barke'tu me xaaliis feene a xatna ? Nam lakas we a nga'tu ciko ke Roog na cooxit ale wo too a ndeef o jaf of ?

4. **Lalgand na cooxit ne Roog a laytuuna**
(2 Korint 9: 6-15)

- Layi ne a tuup fo a saxad no xaana xooxaaa a waagu o nandantel fo ci'it (2 Korint 9:6).



A lalgand a lakas no ke jofna na cooxit ale:

2 Korint 9:7

- “O kiin noo kiin” – Oxu refna a wara o bisiid no ke ta jegna,
- a cooxit kaa war o ref kaa xebooxeena ,
- a cooxit kaa war o inoor no xeeñ ,
- a cooxit refree kaa o fi'nooreel too jabino ,
- a cooxit kaa war o fi'tel fo o daay o motu sik.

Xar na taxaa a cooxit ale a fel too a yoo6 ? Cooxtaa yaam yirmande fee Roog daawoona , jeg o daay fo o mbeq yaa o ci'aa lakas we , cooxit no halal of mal na o gimoona o ga um.

2 Korint 9: 8-11

- Kaa i ci'taa fo xeeñ letu fo o daay too mbañ o jeg yiig a fak yaam Roog a waaga o ci a in yirmande um boo ta dey sik ndax I ñakkee dara . Mbetandooxyo, . I mbaage muk o ndabid a Roog!
- O ga o maak ole Roog a jegna no xeet fe ten refu da ngidmaan na pi den (eucharist).
- Fat fop a ref yaam o ndam Roog !!

2 Korint 9: 12-15

- Oxe na cooxtaa kaa barke'eel no daay ole ta jegna yaa ta ci'taa ndaa a tegit ale no ndabid ne o mat xan a inoor na Roog .
- Oxe na daawaa ci'it ne itam a barke'e yaam kaa daawaa kaa ta d'axitna soxla too a roxodoox a toq ole ten ..
- Roog kaa barke'eel yaam ne oxe daawna a moyna o may fo o ngidim no ke Roog a fi'anuuna.

Pool a muukta fo xa delem axene *"Sam Roog a boxotel o ngidim yaam ci'it ne ten jegeerna nand"*

- Fat nu njeetaay too lay ne yirmande fee a feeñitna a qool qac na Yeesu yee ta refna took a kurwaa le .
- Ndax nu mbaaga o deet a kurwaa le too ta fañ o supit na nuun tig, nu seraan o cooxtoox na Yeesu , nu seraan o ci lakas we ne Yeesu a cooxtooxina yaam nuun ?

Kene kaa ref tigil kaa nqotteena na Biibal too a laytaa kaa jofna no a cooxit , da inoor na 1 Korint 16, 2 Korint 8+9, fo xa saar xa leng leng.

- Layi we mbarna o jeetaaytel no tigil keene .
- Xar o and ole no tigil keene a waagu o bisiid a suptax no ñoow of fo no jangu fee ?

A ci'it refu...

- ...A qaaj no ñoow ole no kimu xe (Mace 6:1-4)
- ... A wara o ref no kunpa (Mace 6: 1-4)
- Kaa na doxaa o ngim in ne ta waritna (Lik 16: 11-12)
- ... kaa war o ref kaa xebooxeena (1 Korint 16:2)
- ... A war o waajanel (1 Korint 16:2)
- ... A wara o liibel no jeg ole (1Korint 16:2; 2 Korint 8:3)
- ... Waree o fi'tel fo o samar (1Korint 16:2)
- ... Oxe mayna halal fo o ndool mbodu teen fop mbarun o mbi (2 Korint 8:2)
- ... A ref a cooxtax nen sadax (2 Korint 8:3, 10-11)
- ... Fo yiif letu (2 Korint 8:3)
- ... Kaa o faaxtel o ten (2 Korint 8:4)
- ... Ne Yeesu Kiristaa a fi'tuuna (2 Korint 8:9)
- ... A doonel no a tuup fo a saxad (2 Korint 9:6)
- ... Jalandoor fa Roog (2 Korint 9:6)
- Foo xeeñ letu (2 Korint 9:7)
- ...O woob ndax Roog a ci'it (2 Korint 9:7)
- ... A fi'el foo o paaxel (2 Korint 9:7)
- ... A ref lalgand no lakas we (2 Korint 9:7)
- ... waree o fi'tel fo a tagid a ñoobu (2 Cor 9: 8-10)
- ... A cur a gidimir a Roog (2 Korint 9:12)
- ... O woob ndax o coox a Roog o ndam onqe fop (2 Korint 9:12-15)

KE A BIIBAL A LAYNA NA COOXIT

A cangin 5: Jeg daap na cooxit

Xa ka xa betaq no daap ne halal a gaynaakteel

1. Fat ke na sutooraa no halal of a moy o neew ke na rokiidaa
2. Moytooxi xa lad axe
3. Fat nu jeg maa nu ngeekaa .
4. Fat nu njeg o ga no ke na garaa taa mbaamir
5. Fat nu ngim ee Roog jegu keene fop

O jeg yiif ole no ne halal fee a jiriiñoorteel

1. Fat o fi xayma no xaaliis naa doonooxna na xa ka xa betaq axe no ne halal a jiriiñoorteel
2. Kam a qed, mbaadyo o bug ole Roog too nqalaat ne nu ñoowtaa (Xa Petit axe 3:5-6)
3. Jang o waag o doyllox (Filip 4:11)
4. Fat o moytoox a yaaw (A Sutax ale 20: 17)
5. Baa liib o ñoow of fo ole no lakas we (1 San 2: 15-17)
6. Naangyo ci'taa fo o day (1 Timoté 4:4)
7. Fat nu ñoowtaa onj nuun (1 Tesalonik 4: 11-12)
8. Ba nu nandandoor fo adna fee (Rom 12:2)

Daap na cooxit

Nqalaaty xa qos xa tadaq na cooxit ale

1. Liibyo ke nu cooxtaa : ke warna o cooxtel refu 10% no jeg ole wo.
2. Jeg daap na cooxit : ke wareena o cooxit ten refu podu nen ke cooxtoona yaa sadaxtoona
3. Jeg a kebas o ci'it : ke wareena ci'it kaa fod fo ke waroona o cooxit yaa Roog a barke'toonga tig lakas



A liib ale no ke jangeena fo ke I mbarna o mbi :

1. Ne I muukaa a cangin alene na Biibal no kaa xotna na ci'it, layi no taɓ raɓ ke hupna o njiriiñ no ke nu njagna
2. Kam a qeɗ, qalaaty o suptax ake soxla'ona o njeg ndax o waag o fer o cooxtaa fo o ngim ndax o dimele a pastoor of fo caɓel ke na jangu of, fo no saate of . Wetandooxi yee, a cooxit ale xaaliis of kaa war o fog teen , saxadee le wo , fo xa siir of , baxtu of fo o waag of sax .
3. Nam refu ne bugoona o fer o jalantaa jangu ndax o fap gimu lakas we fo itam a topatax ale no saate fee no soxla ke ten ?